

Boko 92 nan d. 20  
1993 SAN KALO SEEGINNAN

# Jekabaara

## Jamana Cikela coman na musoman kunnafonisoben

Faamuya Yiriwaton



### Dakunw

Ne 2  
Kalan nafa ka bon ni tunga  
fe taga ye

Ne 3-4  
Politigtonw bilama Mali kono

Ne 5-7  
Seneko bilama Mali nemaaaw bolo

Ne 8  
Poyi : Demen

Ne 9  
Welesebugu kubeda

Ne 10  
Ninan samine daminecogo "ODIMO"  
mara kono

Ne 11-12  
Mali ntolantan ccederw "Egili" miniji  
sigra Tinizi

Ne 12  
Yaala ma ni

### Fililatilen

An be yafa jini ke Jekabaara kalanbagaw  
fe, ka masoro boko temennen tun ye 91 nan  
ye (a sebenna 90 nan).

### Kalo laadilikan

Waati be se fen bee la, nka  
hakilima be waati bee ke !

Zan Sako; Kaaba zafukuntigi

## SENEKOJOYORO BILAMA MALI NEMAAW BOLO



# Kalan nafa ka bon ni tunga fε taga ye

Nin ye Jekabaara kalanbaga nana dō ka seereya bataki ye

Sukoso, 1993 san kalo 7 nan tile 22

Tumani Yalam Sidibe, ne nisondiyalen de bε nin letere ci i ma. Ne bε awka Jekabaara nimoro (boko) bεe soro. A kera sababu ye ka faamuya caman di ne ma "AW" baaraw sira camankan. Ne ye san 8 ke Bamako. N labanna ka n'a ye ko fεn bεe bε laban sene de la. Ne sigilen bε n faso la sisan. N bε n bamuso balo. O dugawu bε n ye. N bε kɔɔri sene k'a fεrebo fana. O fana dugawu bε n ye. An ka dugu fana ye danaya da n kan ka n ke "A W" sekereteri dankan ye. N bε dugu ka senekekow bεe jenabo, ani ka kɔɔri wariko fana jenabo. O danaya ma da ne kanjamana wεre kono. Wa, o danaya ma da ne kan lakolikalan na fana. An balima cikeladenw, n'antε fεn sorojamana

kono, an ka na an fasola. Senekela bε dugutaama min ke ka taa wari nini na, ni an y'o dugukolo kelen baara, o nafa bε bonya an ma ni "taransipori" bò ye ka taa jamana wεre.

N b'e Yalam Tumani fo kosebe, i ka jemukanw koson Jekabaara bokow kono. N bε foli lase an ka sεfu zayeri ma, Gawusu Trawele. N bε foli lase Zanga Dawu ni funko Dawu ani Jakarija Kulubali. Olu bε bɔ Zangaso. Tumani, i jija cogo bεe la n ka jaabi soro n ka letere in kan Jekabaara boko wεre la. N'o kera, n bε to k'an ka dugu kibaruyaw lase aw ma tuma bεe.

Nin bataki in sebenna Burama Kone de fε, n'o ye senekela ye ka bɔ Sukoso, Kuniyana Kubeda ; Kucala kafo.

## JAABI


N balimakε Burama Kone, bamananw b'a fo ko : "Ni mɔgɔ min y'i kanu, n'i m'o kanu i bε taa i jugu kanu". E min ye ne kanu Jekabaara sababu la, n b'i fo k'i walejumandon. I ni ce i ka bangebaa ladon na. I ni ce i ka faso-jo-baaraw la. i ni ce i yεre ka hakili numantigiya la. E ye min ke nin ye an b'o de la nini jamana den kelen-kelenbεe fε. Wali faso mana diya cogo o cogo, a tε yεre faso bε de. An fana bε lahidutai yε ko : n'e ma sεgen bataki cili la an ma, an tεna sεgen a laboli la. Jekabaara kono ! An bo de jini : Jekabaara kalanbagaw ka batakiw ci. O de b'an nafa barisa, mɔgɔ wεre ye mɔgɔ dɔn cogo o cogo, a yεre de b'a yεre dɔn ni mɔgɔ tɔw bεe ye. An b'i fo, k'ibamuso fo anii ka denbaya bεe. An b'awka dugumogow bεe fo : a ce n'a muso bεe. Ala k'aw ka "A W" taa je !

An ka aderesi jɔnjɔn file nin ye :  
Jekabaara kunnafonisεben  
B.P. : 2043 Bamako (Mali)


An y'i ka bataki soro 1993 san kalo 8 nan tile 3 de.

K'an ben a jɔgɔn wεre ma.

Tumani Yalam Sidibe.



# Politikitonw bilama Mali kono



Gawusu Drabo

San fila, 1991 san kalo 3 n (marisikalo) tile 26 kofe, a kafisa an ka hakilijagabo ke Mali politikitonw kan, ani k'a don n'a y'a soro u y'u joyoro fa. A ka kan hakililajigin ka ke ko "Politikiton camanko" de tun ye jemufanga dungew ka lajini ye kabini 1990 san kalo 10 n (Okutoburukalo). Jemufanga dungew bolo, dan tun ka kan ka sigi Pariti "UDPM" ka pariti kelenya fanga la, walasa ka sira di fasoden werewma uka sek'ufeta fopolitikiton werewkono. Nka, jamanakuntigikoro Musa Trawele ma dijen n'o ye abada, barisa, a bolo, o tun bena n'ale ka fanga tijeni de ye.

Nka 1991 san kalo 3 n tile 26 wuli-ka-jo kelen ka sira soro, fanga tabaga kuraw ka ton, n'o ye "CTSP" ye, o ye politikiton camanko yamaruya a ka baarasabebna folo kono (Min tun be sariya baju nona). O ro, yamaruya tun be bee kelen-kelen bolo k'i sagonan politikiton sigi sen kan. A dan tun ye politikiton

in sintin tun kana ke siyako walima kabilako ye. A tun kana ke diinako fana ye, walima jamana sintin yere rongoton. I n'a fo an b'a ye cogo min, dan kelenpe min tun sigira politikitonko la, o tun y'an ka jamana yere de sintin ye.

O seben o bolen, politikitonw bangera ka caya. O kun tun ye de ko bee tun b'a don ko "CTSP" tun tene men senna. O kanma laben telin ka ke "Konferansi Nasionali" (Fasosigi-ka-fa-ba) kunkan ani wotenataw (kalataw) ! Nka Konferansi Nasionali" (Fasosigi-ka-fa-ba) m'a tulutige politikiton kura ninnu bolo ! Konferansi Nasionali kebagaw ma dije n'a ye demen ka bo jamana kun ka di politikitonw ma nafoloko tasira fe, i n'a fo a be ke jemufanga jamana tow fe cogo min. Uyere y'a wajibya politikitonw ma u k'u ka mogo suganditaw togosebenwarisara wotew (kalataw) kanma. Uyajira kodiinako politikiton te sigi sen kan. Uy'a bali politikitonw ma fana u k'u ka baara musaka fanba jini jamana kokan. Nin ko ninnu bee tun be faamuya. Pariti kelenko (UDPM) kasaraw tun ma bo mogo si kono. Bee tun b'a don k'o tun wasa donnen be faso nafolo de la.

"Konferansi Nasionali" temennen, politikitonw wajibiyara ka baara ke n'u yere ka musaka ye. O ma nogoya don u ka baara la wotew (kalataw) labenniko la. O de kanma an b'a faamu ko pariti 24 doron de sera ka u ka mogo sugandita di méri

sigiwotew kanma, 1992 san kalo folo, pariti 48 na ! O pariti 24 na, 19 de sera ka konseyew soro. Depite sigiwote senfe, pariti 21 ye mogo sugandita bo. Olu la, 12 doron de sera ka depitew soro. Fen min ye peresidan sigiwote ye, pariti 9 de tun ka mogo be kene kan. Nka kelenpe de tara olu la. O de kanma geleyaw cayali damineawa politikiton caman fana ye tununi damine. Meri sigiwotew ni depite sigiwotew ani peresidan sigiwotew temennen, Mali politikitonko sensenna. Fan kelen fe, jamatigi politikiton, n'o ye (ADEMA) n'a ka depite caman an'a ka konseye caman, ni politikiton were minnu dijena n'a ka baaranogonya ye, ton kono min be wele ko "PSPR" (RDP ; RDT ; Baba Akibu Hayidara ka USRDA bolofara ; UFDP).

Fan do in fe, o tun ye fanga fadenma politikitonw ye. Olu lagirinmanw tun ye "CNID" ; Cewulen Konate ka USRDA bolofara ; RDP ; UDD ani PSP ye. I n'a fo jemufanga tobee kono, baaraw tun lajeyalen don : Pariti jamabatigi be jamana mara, a fadenma paritiw b'a kolosi ani k'a ka filiw fo.

Kowtora nin cogo in dela fo ka se 1993 san kalo 4 n tile 5 balawu ma. o de senfe, jamanakuntigi ye bolodijogonma ke fanga fadenma pariti dow ma (CNID ni RDP). Bi-bi in na, olu togolamogo be setigiblon na (goferenaman). Kun min b'o bolodijogonma na, o de ye ko bi bi in na, pariti kelen si te se k'i kogo da

## KA SE DUGUW MA

Mali jamana kono geleyaw la, Ala n'u sicaya n'u girinya koson. O de kanma, politikitonw ka kan k'u ka fognogonko-siraw bila kerefe folo, k'u bolo di nogon ma, walasa k'an ka jemufanga lakisi ani Mali jamana yere. Jamanakuntigi y'a ka wale sementiya ni nin tijew de ye. RDP ni CNID fana y'u donkun sababu ke n'o tijew kelenw de ye setigiblon (goferenaman) na.

Yali Pariti caman ka fara nogon kan, o bera geleyaw nogoya wa ? O be se ka kebarisa a be fangakura di setigiblon ma a ka baaraba kela werewfana bolodonbaarala, minnu tun ma dijne ni setigiblon ka baarabolo ye folo. Min tora sisan, o dey'a sementiyali ye politikiton ninnu fe ye k'u ye nejini ke jamana geleyaw la, k'anifana ubeka fura sorou la! O ka kan, ka d'a kan, san kelen, fangabolo sabanan ka fanga tali kofe, fura ma sorogeleyaw la folo. Kalo 12 kono, ko yelemtaw dogoyara. Wariko geleya be ka sankorota ka t'a fe desebaatow bolo. Fosi fana te ka ke min b'a jira k'o bera nogoya.

Jalaki ninnu be se mogow de ma jama y'u ka danaya da minnu kan ka jamana nekun d'u ma. O yere de kanma, "ADEMA" politikiton y'a ka "konferansi nasionali" ke juluyekalo (kalo 7n, 1993 san) damine na, min ma kunkun to nejen na. Pariti jamatigi (ADEMA) ka lasigidehy'u sugandibagaw ka haminanko be fo. Olu b'a fe sa ko pariti ka kuma fo da soru setigiblon ka baaracogo la. U ko barisa olu ka kan ka dantigeli k'u sugandibagaw ye. O kanma, a wajibiyara setigiblon ka baara keteta



*Setigi Nema Abdulayi Seku So*

be se ka taa jama ka here lawaleyali sira fe. Kolosili ninnu sinsinnenw don, barisa ni mogow y'i sugandi, u ne fana de b'i la de. A ka sugandili fana ye don nesigi de ye. N'ka, on'a tabee, yali "paritipolitiki" fana be se k'i sendon setigiblon ka baara la wa, n'o t'an nase "pariti kelenko" ma? Anw ka jamana kono, "pariti politikiw" be goferenaman (setigiblon) ka baaraw kolosi depiteblon kono, jemufanga hukumu kono. Fanga caman be depitew bolo goferenaman kan.

**Folo :** olu de be goferenaman ka baara bolodaseben segesegé ani k'a lawaleyali yamaruya. O koro ye kon'um'uka yamaruya di setigiblon nemago ka baara bolodalenw kan, o te se ka ko ke.

**Filan :** Depitew be se ka sariya tataw k'u sinsinbere ye. N'u y'a ye k'o min te taa jamanaka here sira fe, u b'o tali bali.

**Sananan :** Depitew be se ka setigi (minisiri) welekenekanakan'a ka baara keteta pereperelatige. Okoro

ye kopolitigitonw be se ka setigiblon kolosi cogo be se la. Nka halibi o te k'a ne ma. Osababu be bodepite caman ka "cela kalanwaati" la. nka siga t'a la ko nin, kow be yelema-yelema doonin ka t'a fe. O yelema yere be ka kolosi ka ban mankanbaw senfe min be don depitew ni setigiblon nemaa ce, oka baara bolodasebendantigeli senfe, fo wele be bila mogo faamuyalen werew ma. An hakili la, o be taa nefe. Awa politikitonw fana b'u jeniyoro fin depiteblon kono.

### Depiteblon kofe, a ka gel'en politikitonw ka seba soru

Fen min ye kominiw kono na ye, olu geleyaw ka ca sew ma. A ka kan jamana ka demen don olu ma walasa u be se k'u ka baara ke cogo min na. Nin be se b'a to a be faamu mun ye pariti caman galabu faga, minnu caman bangena nogon nufe 1991 sankalo 3ntile 26 wuli-ka-josababu la. Halijemufanga jamanabaw kono, a ka gel'en pariti nciininw ka si jan soru !

### Kunceli

An be se k'a fo ko pariti politikiw tungalabuka kene haali wotewaatiw la. Nka sisan, a caman bora mogow jigi koro ka da u ka galabu karili kan. Nka o yere de ye jemufanga ye : ko be laban paritibaw de bolo, se be minnu ye ka setigiblon ka baara ketaw kolosi ani k'u segesegé.

### Gawusu Drabo

**Mali faso ganseli baarada ("AMAP") Nemogo.** Kunnafo ni sekow setigiblon - Bamako

# Seneko bilama Mali nemaaw bolo

Nin ye jemukan ye min temenna Jekabaara seben nekulu ni Mali senekow setigida ce (minisiriso). An tun ka lajini ye an ni seneko setigi yere de ka nogon kumanogonya masalasen fila kan, n'o y'an je nogonke Bubakari Sada Si ye. Nka, an y'a bolo degunnen soro, o kanma an kunnafonibaga kera a yere korosigi ye, min ka baara bennen be kunnafoniko laseli ma a ka setigida kan. O y'an je nogonke Toye Irisari ye. Ayiwa, an k'a lamé seneko joyoro kan Mali kono ani Setigi Bukari Sada Si ka taama kan MAKOCI maraw kono.

## I-Seneko joyoro Mali nemaaw bolo

"Bee ka kan ni kunnafoni ye bi ! K'a ta Mali jamana yere sigili don ma ka na se bi ma, an bee lajelen tun be nin de jini jaati ! Fen min ye masalasen folo ye, sanni an ka se kuma yere cemance ma, an ka kan folok'an ka bi fanga in buruju fo. N'o kera, fili tene ke hakilinan taafan na belen. Fanga in buruju ye mun ye ? Bee ye jihadiba in ye min kera an ka jamana kono (1991 san kalo 3 n taw). Tijé don, a ma se togodaw la, a ma se dugu daw la. Nka bee y'a funteni ko men. Bee y'a mankutu men. Onana niyelémaba de ye an ka jamana kono. Yelémaba in nana ni sigi-ka-foba de ye an ka jamana denwbee ni nogon ce, walasa ka ben jamana sigikanw kan. O kera "konferansi nasionali" ye. ("I n'a fo Manden sigikan !) Mundedun wolola "konferansi" in kono ? A nana ye ko senekelaw ; bagangennaw ; monnikelaw, olu de ka ca ni birodaw sebennikelaw n'a dönnikelaw ye. O tuma na, fu danma-sigi-ka-fa de ka ke. U danmakunko ka fo. U danmawalewka sira soro. Ode welera ko cikelaw ka sigi-ka-foba (etazenero di mondi irirali). Anw fe, o ye koba de ye. Ka d'a kan, laadilikan fen o fen bor'o kono, an (senekelaw setigida) ka baara be nesin o de ma. O boilen ko yen, an ka jamana kono, kalata kera (wote). O kera jamana den jumanw ni nogon ce. Bee lajelen benna Alfa Umar Konare kan ka masoro jamaba taar'o fan fe. Ala y'an ka fanga kalifa o ma. A ka waati san duuru konona na, ale fana b'a ka danamogo de jini



## Toye Irisari

K'u bila an ka Mali baaradaw kunna. Ni Aladuny'ake a ka mogosugandilen benna Bukari Sada Sima, senekelaw ka setigya la, n hakili la, o ye ko janamaba ye. Ale donnen don Mali baganmaralaw n'a senekelaw fe kosebe. Kerékerénenya la, Mali worodugujanfanfe, koorisenenawbee b'a don. O boilen ko yen fana, baganmaralaw bee b'a don ka d'a kan, a ye san caman ke olu togo baaradakunna... Obolenkojenfana, Malijamana yere kanubagaw b'a don. K'a d'a kan, a ye wale minnu ke ka temen, a ye ciya minnu ke ka temen ni bee lajelen y'olu no ye. Kabo MAKOCI la ka na baganko baarada la. Fen min y'a joyoro in yere ye bi, n'o ye setigya ye, a ye baara caman k'o konona na. O fana boilen ko yen, Mali jamana demenbaaw yere, n'an k'olu ma ko "Banumankew", olu donko b'a ka baarakcogolakosebe. Ubetaanuba

d'a kan. Oyoro okoson n'anyenin bee fo, gansante. Baara bee ye danayako de ye ! Danaya ka kan ka don senekelaw ni goferenaman (setigiblon) ce. Danaya ka kan ka don senekelaw ni senekelaw baaradaw ce... San duuru in konona na, an ka baara bena nesin cikelaw ka sigi-ka-foba baara bolodalenw lawaleyali de ma. Nesin be k'o de ma. Nka nesin te se ka ke fosi ma bi n'i ma wuli k'a tigiy yere de segeré. K'u jininka. K'u feta don k'a lasa. O tuma na n'i be min ke, aw be je k'o ke de ! Je-ka-ke, o tile de bora ! An bee lajelen b'a don tubabuw y'an mara folo cogo min na. Tubabufanga taara. Nka, farafinfanga min fana sigira, any'o fana cogo don ! Afangaw falen-falenna nogonna ka na se bi ma. Bidun, a faamuyara ko : mogoyer de te se ka demen i yere ko fewul Bee de fana ka kan ka sigi n'a ye ko : den min b'a kaman korota, o de taa ka di !



## Seneko setigi Bubakari Sada Si

O kanma an k'a laje nōgōnfé. N b'a fə k'a fo de ko : Ala ye ciñen de d'an ma, ciñen min ka gelén. Ni n ko ciñen, mun de don ? Bëe lajelen b'a dòn fangabolosabanani bangera gōngōn min kono. A wolola funteni min kono, bëe b'o dòn. Otuma na, ni maa min ko ko : fanga fin don, o kuma tè ! Fanga fin tile banna. Jemufanga de don ! O fanga o dun, ni bëe jéra k'a sigi, maninkaw b'a fo de ma ko : "Bëe-ya-fanga". "Bëe-ya-fanga" ani "Bëe-je-fanga", Olu fana tè kelen ye. An k'o fo k'o bo a la pewu ! Bëe-je-fanga t'anw fə yan Manden ! "Bëeyafa" fanga de b'an fə yan. Bëe bë se k'a ká fota fo min na. O de ye "Bëeyafa" ye. Bëeyafanga, anw fə yan Manden, o ye diya ani goya deye. An bëe b'o kun, ka masorō

ciñen de don. Sisari, bëe bë se k'i ta fo fanga n'a taabolo kan ani baara n'a taabolo kan. O de y'a diyayɔ̄ (bëeyefanga) ye anw fə yan ! Nk'a goyayɔ̄ ye min ye fana, sigi la, f'an ka nōgōn kun de. An ka sigi ka nōgōn kun, o fana y'an ka danbeba dōde ye. O tuma na dun, sēnēkəbolo fanfə, anw bën'an cësiri de. Fen o fen n'o de ka kan ka dilan ka di sēnēkəlaw ma, n'u nafa b'a la, o lawaleyasira bë jini. A bë taama. Nka a tè se ka kë bën kō de ! Ben, f'an bëe k'o yɔ̄rɔ̄ n'i dugubaw la, togodaw la. An ka jékonona na, an ka bën lasabati. N'aw bennēn don, mögōw b'aw dëmen. Aw ko bë diya mögōw ye. Ni mögōw nan'i sɔ̄rökéléla, i dëmenbaa bë dögoya. Ala sago i sago. I ka kɔ̄rofɔ̄ jaabi folɔ̄ ye nin ye.

## II - Seneko bimà lahalà Mali kono

Sené ye Mali ko koro de ye wo. Bi don in na, Mali kono, n'i ye senufow kofɔ ; ni ye bamananw kofɔ ; n'i ye mijankaw kofɔ ; n'i ye marakaw kofɔ ; ... Bëe lajelen b'a dòn k'i ye cikèlaw de kofɔ. Fen min ye baganmaramasaw ye, n'i ko fulaw, Mali fulaw, k'a ta Moti ka t'a bila fo Wasolon na, bëe b'a dòn k'i ye baganmaramasaw de kofɔ ! Fen min ye jagoko ye, o fana bë ten ! Fen o fen, n'i y'o ta, o kebagà numan de b'an fə yan Mali kono ! O de koson, anw hakili la, ni maa kalanna kolai bë ko min kë, o de kafisa. N'i dëmennna o la, i bë jetaa sɔ̄r. O tuma na sené ka kan ni dëmenni ye. Goferenaman ka kan k'a fanga d'a ma. Nka fana, an ka jamanawkono, mögōcamany'afaamu ko : goferenaman de ka kan ka ko bëe kë. O yɔ̄rɔ̄, an ka kan k'a dòn ko goferenaman tè se ka ko bëe kë. K'a ke ka mögōwwasa. Okagelenkosebë. Kad'akan, an b'a dòn ko goferenaman tun bë senefenw sannifeere kë. Geleya min donn'o la, bëe b'o dòn. Hali ni goferenaman yëre ye sumanw san, jø o yëre, ladonyɔ̄rɔ̄ geleya b'o la : tijenifénw bëdonala, mögōwyëre b'u bolo don a la. O bëe lajelen de y'a to goferenaman y'a ye k'a tè se k'a kë ka jë ka d'a kan se t'a ye. O rɔ̄, minnu ka kan ka se k'a kë, a k'a ko to olu bolo !

Ni goferenaman yëre ko k'a bë seneko nasira bëe ta, k'i disi d'a kan, a tè se. O la sa, a numan ye min ye, o de ye a ka dëmen donni ye ko kebagà numanw ma.

## III - Setigi Bukari Sada Si ka MAKOCI mara taama

Folɔ̄-Taama kun : Nintaama in, an y'a kë ka d'a kan, setigi (minisiri) sigira a ma men. I n'a fo n'y'a fo cogo min kuma kono, maa tè ko dilan mögō ye belen, ka sɔ̄rɔ̄ aw n'a tigi ma sigi ka foli k'a la. O de kanma setigi yetaama in kë walasa a ni sēnēkəlaw ka jügonye kë, ka kuma. U ka

nogonfaamu. U ka nogon kuntilenna don. U ka nogon hakilinanta don. Hakilinanw falenna nogonna. Senekelaw y'a don. A ka taama kun folo y'o ye. Filanan ye min ye, samijedonda in na, a y'a nini ka taa a ni senekelaw ka je ka dugaw ke. N'u ye dugawu ke, oy'an kalaada koroje. Ala ka samijne juman d'an ma. Ka ji juman d'an ma. Ala ka samijne foori. A kun sabanan ye min ye, a ni senes nemogow fana be sigi ka kuma, n'olu ye senekelaw lakalanbagaw ye. Olu fana ka kan ka baara mincogo min na bi, yelema kadara kono, ka d'a kan yelemani bena ni hakili kura de ye. Hakili kura fana bena ni yelemani de ye. An k'o don. Bee lajelen k'a don ko mogote se ka mogo mincogo belen i n'a fo bolokofemogo. Ay'olaadilikanw kelen-kelenna fo baarake nemogow bee ye. Nka, nin bee lajelen be bonya konoona de la. Barisa an y'a kolosi ko d'ow fana te bonye sinsin belen an ka jamana kono. Bonya sinsinbaliya dun bena ni geleya ye. Ni baara kenojognw ye nogon jate, o de ka ni. Barisa minnu be nogon bonye, olu de be netaa soro. Ninnu de ye taama in kunw ye. Ala sago i sago.

#### 2nan : taama temensiraw MAKOCI mara kono

Taama in daminenwa Buguni, ka t'a kuncé Doyila. An y'a faamu taama in senfe ko, an be don min na i ko bi, senekelaw ye kuma ta ! Senekelaw labennendondi ! Wa "sendika" b'ubolo ! koperatif be senekelaw bolo ! Senekelaw yere be se u haminankow focogo juman na bi ! An y'o kolosi hereko ye an ka jamana kono. Here min don : "ni den min be se k'a fo kon yan be n dimi, n yan be n dimi, o be baara nogoya a furakbaa bolo kosebe. A b'a furakeli sennateliya fana." Senekelaw ka kan k'u timinandiya u ka sira o fe. K'u ka "sendikaw" dilan ka je. Ka d'oniya d'u ma. Ka d'oniya nini u ye. U ka


koperatif ka kan ka dilan ka je, ben ka ye a kono. U k'u kunsinfenw bee kerener, k'a dilan ka je. O b'u demenbaaw bolodem. O b'u demenbagaw sennateliya. O b'u kunko foli diya ! An y'o kolosi taama in senfe.

#### 3nan : Geleya

Koeriseneaw ye koeriko geleya fo haali. U ye foli k'a la, min ye koeri songo ye. U ye foli k'a la, min ye koeri sugandili ye (kalite). U kumana koeri nogo songoko kan. U ye nin bee fo k'a geleya kosebe. U y'a jira fana ko koeri songo dogoyerara bi, ko nka fana, koeri ye fen ye min senet se ka dabila an ka jamana kono. An ka soro kun folobe bo ale de la !

Baganmaralaw fana ye mun fo ? Baganmaralaw y'a jira ko degun b'u kan. Baganw bena nogon soro kenew kan, kene minnu be ka dogoya u ma. Dumuni desera u la. U y'a jira ko bagandumuni min be tilan "turuto", k'o deselen b'u la. Nk'o n'a ta bee, baganmara ni koerisene ye fen ye an ka jamana te se ka minnu dabila. Fo jenini de ka k'a la. Dilanni ka k'a la min be bee nafa. Otuma na, setigi y'a jira u baaradaw jemaaw la ko jenin bena k'u ma. Ko siga si t'o la ! Ji

minyoro ka kan ka dilan. Temensira ka soro. Bee lajelen ka nafa soro i ka keta la. N'i ka keta ye senet ye, a nafa ka soro. N'i ka keta ye baganmara ye, a nafa ka soro. Nin bee lajelen ye geleyawye, senekelawye minnu lase setigi ma u kunkan. A diyara a ye. A y'a faamu fana ! Monnikelaw fana ye do fo de ! Monnikela do y'a fo Buguni mara la, ko tine yere la ni mogo be labenni ke jisiraw fe, ka baraziw da, u t'olu nininka. Ko ni barazi dun dara, ni ji nana dogoya, ko monni be ke cogo di ? A y'a jira k'a fo ko mogo ka kan k'i hakili'to la. Setigi y'a jira ko tine b'a fe. O kanma a y'a nini d'onnikelaw fe minnu be segesegeli ke yen, ko n'u y'u ka baraziw sigi, u k'u hakili to bee lajelen na. Baganw be min na wo, monnikelaw b'a la wo, maloseneaw b'a la wo, o bee de jate ka kan ka mine. An ye mun fana men mogow da tugun ? Fen min ye Sikaso mara mogow ye, bee b'a don ka fo ko bi-bi in na siga donna olu ni MAKOCI ce. O bee lajelen bora mun na ? Ne fe, anw fe, bi don in na, ni geleya nana an ka je k'otilan. Ni nogoya fana nana, an ka je k'o fana tilan. Maninkaw ko ten ! Nin fen fila ye dijne sigi de ye. Nogoya ye dijne sigi ye. Geleya fana ye dijne sigi ye. Ni geleya nana, a ka dilan.



Mali seneko setigida

## KA SE DUGUW MA

Hakilinan de bē se k'o ke. Ni numan fana nana, o ka dilan. Hakilinande bē se k'o fana dilan. Anw ye mögōw bilasira ni nin laadilikanw ye. N hakili la fana, o ye mögōw wasa !

## 4nan : Seneke setigida n'an barakan kunnafonisəbenw césiraw

N'i y'a ye yelema sera ka k'an ka jamana kono, nin bē se de faamuyara. Kojamana te se ka dilan mögōhakenin do fe ! Fen min ye "kan" yoro ye, o ka gelen ne yere ma kosebe. N ya don fana ko nemogōw be cogo min na bi, u ka faamuyali ser'a ma, faamuyali min ni folo ta te kelen ye. "DNAFLA" y'a ka baara ke koyi ! Nka an be don min na i komi bi, jamana nemaaw y'a jira k'a fo ko : n'a fora jamana doni be ta, a takan ka fo bē se lajelen ye. I ka kan na i ka soro k'i kun don a koro. N'i y'a men cijen, a be tilan kan do de la. Folo, mögō tun dalen t'an ka kanw la. Nka bi, bē se lajelen hamina de don. Ne yere be don min na i komi bi, n'y'an ka

baarakeda bē se joggonkan. An bēna tile 15 balikukalanké. An b'a wajibya umá, n'u bē kuma, u k'a kuma fō u ka kan na.

Ni min bē fulakan mēn, i k'a fo k'a je. Marakakan, senufokan...i k'a fo k'a je. I balimaw k'a don ko i ka dōnniya bē se ka lase i ka kan na. N'i te se ka dōnniya lase i ka kan na, a bē i n'a fo i ye mögō min bila ka taa dōnniya jini. A yere ma na, dōnniya mana. N'i taara dōgo jini kungo kono, e ma na, dōgo tora kungo la, o te mako je an ka du kono !... Fen min ye lakukan jininaw ye, minnu bē baara ke jekabaara la u ka fo kosebe ! An fana b'a jini u fe u k'u césiri ka nin faamuyali lase an ka ciyakeda tow la.

## Kunceli :

Nekoni fe, an ka jamana ye jamana numanba de ye. Maa min ko jamana in ka gelen, an be son o ma. Nka maa min ko jamana in te dilan, an te se ka son o ma. Barisa, k'a ta Manden fo

Kidali, a bē se ye adamaden nafama de ye. K'a ta Manankoro ka t'a bila Menaka, a bē se ye adamaden nafama de ye. Ni adamaden dun bē maa min fe, o de ye nanfolotigi ye ! Se b'an ka jamana ye. Nka an ka farifaga de bo baara la pewu ! An k'a jate ko "tubabubaara" banna pewu. Ko yeredemen tuma de sera ! I kana i sigi ka maa makonon. I k'i hakili dayelen. Ka dōnniya jini, ka faamuyali jini. I k'i césiri, k'i ka baara bérékeje i yere ma. N'i y'a bérékeje, mögō mana i soro o baara la, a n'a don k'i ye maa césirilen ye. A n'a don k'i ka kan ka demen. N'i demenna, i fana bē maa were demen. A bē nōgon bolo mine ten ka taa. Ala sago aw sago. Nin ye Mali taabolo de ye bi. An bē se lajelen k'an jija. Farifaga ka dabilo pewu !

N'in tun ye Toye Irisari kanyé, n'o ye seneke Sekigi ka kōrōsigi ye kunnafoni taasira fe. A ni Tumani Yalam Sidibe de masalara.

## POYI : DEMEN

## Demen

Bidulokininkanbadonbaga kōnogan. N'a ma bonya kamankun ma, a na kō to tile la.  
- Bonbonnin kun fila ; min kun do te dun ka do to.  
N'i y'a dunni damine a kun duman fe, a be laban ka kunaya i da.  
N'i dun y'a dunni damine a kun kunaman fe,  
a be laban ka timiya i da.  
Demen kera bi mögō dakonogese ye.  
Cew da foronnen be bi demen nofe.  
Musowyere be ntaraba soori bi demen nofe.  
Denw be kasi la, ko demen.  
Lonjuratoya t'a la tun !  
Bolodesebagatoya t'a la tun !  
Faantanya t'a la tun !  
Kenebagatow de ka jugu wa !  
Bolosebagatow de ka jugu wa !

## Faamaw yere de ka jugu bi wa !

Nin bē se ko demen.  
A' y'an demen ! A' y'an demen !  
Paatisakana !  
Mun nana ni nin ye de ! Nata wa ?  
Nin jumenw dun ni demen ka kan ?  
Tijé don, demen suguya ka ca : nk'an k'a jini ni hakili ye.  
N balimaw, ne siranna demen je.  
Keréñkeréñnenya la  
demen kelen kōtigebali, demenbaga lafili.  
Demen be don mögō ni don ce,  
a te don mögō ni badabada ce.  
Sannafen dun bo b'a filebaga je noroko.  
Demen ye hakilintan lafagun.  
Demen ye cefarin da muluku  
Demen ye Mijetō bila ka kolodunbalii jimi.  
An te hakili soro demenko in na sa ! Su

## demen, tile demen.

Dayimu-kayimu, sin mögō la te hōron danbe ye de !

Demen jini man jugu. Nk'a nobobaliya de ye kojugu ye.

E ! Bamananw ko : bolo be mo bolo kono, nka bolote se ka to bolo kono de. Jaati, jaati, tijé ka kunnan de ! Nka, ale de be laban.

Na n demen ka nin sojo, ok'a soro iy'a jubila,  
demen k'a to lase. So meen-sila be bo a jubila de la.

N demen wara la, o ka soro a kunyanfan b'i bolo.

N balima, keréñkeréñnenya la, mandenkaw, an k'an miiri dōonin Waati be se fen bē se la, nka hakilima be waati bē se ke.

Mögō t'i diya i yere kō de !

An ka yere-demen k'an sinsinbere ye,  
An be bo mögō la,  
An demenbagaw tēna nimisa.

Karamogó Zan Sakó Zafukuntigi  
Kangaba (Manden)

# Welesebugu kubeda

Welesebugu ye kubeda dawulama ye Mali jamana kono. Kerékerenneya la, Kati kafo kono. Welesebugu ye kubeda dawulama ye ka d'a kan cike ni ben ani njogonkanu de y'a sigibagaw sinsinbere ye. O de kanma, an y'an sen bo an yere koro ka se kubeda in na. O senfe, an n'a kubedakuntigi masalara n'o y'an balimake Kola Denba Wayigalo ye. A ye min fo an ye, o file nin ye :

Welesebugu kubeda dayelenna 1959 san de la.

- Bagineda kubeda b'a ni koro ce
- Kuruba ni Kangare b'a ni tilebin ce.
- Bananfanfe, Sanankoro ba kubeda be yen
- Keleya kubeda b'a ni worodugu ce. (Keleya kubeda be Buguni kafo la).

Dugu 72 (bi wolonwula ni dugu fila) de be Welesebugu kubeda kono. O dugu tilannen don "Sekiteri" 12 ce.

Welesebugu kubeda bunaadaden hake ye 35 000 ye. Sekiteri 12 kelen-kelen bee kono, i b'a soro lakoiso ni dogotoroso, adamaden w ka magoneeben dilanyoro ani balikukalanso be yen. O bee kera de walasa ka baara nogoya adamaden ma. N'an b'a fo ma ko kamakoreyoro lasurunya makotigw la. Fen min ye adamaden hake folen ye (35.000) ; adamaden dabatalaw hake ye 21.000 y'o la. Fen min ye dugu 72 ye, cikebuguda hake y'o la 40 njogon ye.

Welesebugu kubeda ni Bamako ce ye bametere 75 ye.

Welesebugu dugu yere mogow hake ye 3500. Bamananw ni fulaw ani mosisi ni julaw b'olu la. Yan, a be fo jagokelaw (julaw) de ma ko "korokow"

## Welesebugu siyaw

N'a fora ko "jitumu", Welesebugu de ko don. Ale kubeda ye jamanatigi sigiyoro koro duuru de ye. Jitumu yere b'o la ; Marakodugu b'a la ; Jonkalandugu b'a la...

Hakilinanta Welesebugukaw kan Geleya ka dogn kosebe Welesebugu kubeda ni mara fangabolo ce. I komi a be fo cogo min na koni, "nin ni nen be se njogon ma waati dow la sanko adamaden". O

kanma, geleya doonin be se ka soro. Nk'u ka dogn haali.

## Lepoko geleya be cogodi Welesebugu ?


Lepoko geleya koni be yen. Nka sigi-ka-fow senfe, njogoyaba donn'u la. Fen min ye lepoko yere ye, o te yen belen ! Dugu yere w ka yiriwa nafolow de be sara, an be min wele ko "TDRL". O nafolow be ke ka duguw layiriwabaaraw kebaaw de sara. I n'a fo n y'a fo n ka kuma damine na cogo

a la. Baarakelaw fana be sara a la, k'a masoro, netaa "sekiteri" be yen i b'a soro baarakela saratala naani be soro minnu kono : Nonabila baarakelaw ; matoroniw ; dogotorow...

Bi-bi in na "nisongoko" koni banna. Lenpo min be sara sisan o ye "TDRL" de ye.

## Welekanka jesin Welesebugukaw ma

Ne be min fo n ka kubeda mogow ye, o de ye k'u ka do fara u ka



## Welesebugu kubedakuntigiso

min, netaa "sekiteri" 12 de b'an feyan. Matoroniw ; ni dogotorow ani kunkosebenw (woloseben...) dilanbagaw n'olu njogonnaw bee be sara o nanfolow de la an be min wele ko "takisi" (TDRL). Dugumogow yere dun b'o mogow joyoro don u ka dijenatige nogoyalila. Ni "TDRL" wari ninnu minna, u be lase kafo la (Kati). Ofana b'a lase mara la (Kulikoro). Olu be soro ka duguyiriwabaarakela ninnu sara. O b'an ka kow nogoya ani ka mogow lafaamuya u ka se ka wari ninnu sara. U yere w b'a don k'a be sara olu de ka na fa kanma. Baara minnu be ke, kenekankow don. U ne b'u la ! Lakolisow be jo a la. Dogotorosow be jo a la. Siraw be dilan

tijminindiya kan netaa baaraw la. Barisa "kofedem" ka kan de ka "yeredem" dafa waati bee ! N b'a jini jitumukaw fe ani Marakodugukaw ; Jonkalandugukaw fe ani Marakaw, u y'u cesiri cogo min na, u ka do fara o kan ka t'a fe. U benneb be ko la cogo min na, u ka do fara o ben kan halibi. N'o kera jamana in be bo nogola. Fosi te ben bo. Ni mogow benna, u be baara numan ke.

Ne be Jekabaara kunnafoniseben yere fo kosebe ka da a joyoro kan kungo-kono-mogow kalanni n'u kunnafonini an'u ka faamuya yiriwali kan.

**Kubedakuntigi  
Kola Denba Wayigalo**

## Ninan samine daminecogo "ODIMO" Mara Kono

K'a bo mekalo tile fôlo ka n'a bila zuluyekalo tile 31 na.

Jateminé minu kera sanji nacogo ani forokénaw minnu sera ka baara an ka cikelaw fe olù file nin ye :

Sanji jateminé

|          |    |       |    |       |
|----------|----|-------|----|-------|
| Kayi     | 15 | 82,6  | 19 | 148,6 |
| Keneba   | 31 | 400,1 | 35 | 462,6 |
| Bafulabe | 30 | 224,8 | 20 | 253,8 |
| Kita     | 32 | 249,9 | 25 | 433,8 |
| Kolokani | 28 | 305,8 | 29 | 435,4 |

Nin b'a jira ko ninan sanji ma salon ta bo. Ji desera Kayi ni Kolokani cikekafo kono ka teme yoro tow kan. Tine don an ka senekelaw wulila baara fe joona ninan, nka zuwenkalo sanjiko geleýara. O de y'a to sumanju ma se ka soro yoro caman na. Segin kera danni kan siñé caman Kayi ani Kolokani. Cikekafo tow fana saheliyanfanw ye geleýa caman soro danni ko la. Kiimeliw ya jira ko danni ye geleýa soro forokene minnu kan, olu ma salon taw bo. Komi samine damine geleýara an ka kan k'an jija kene sabatilenw ladonniko numan na. An bee ka dugawu ke Alasaminielabanko ne!

"ODIMO" baarada Bamako

## Kolokani sigicogo n'a laadalakow

An ye baro ke dugutigi ka bulon kono alamisadon, n'o ye zuluyekalo tile 1 ye, san 1993.

Mogo minw tun be barokeýora la, olu togo file :

Jenfa Tarawele, o ye Kolokani dugutigi ye

Mari Taraweleo ye Kolokani gatigi do ye Negejo Tarawele, o ye Kolokani gatigi do ye

Nco Tarawele, o ye Kolokani gatigi do ye

Jofulo Tarawele, o ye Kolokani gatigi do ye

Dose Tarawele, o ye Kolokani gatigi dm ye

Nininkali kebaga ye Kekuta Sisoko ye, n'o ye ODIMO formateré ye, Kolokani Nininkali fôlo : Kolokani koro ye mun ye ? Jaabi : Kolokani koro ye ko : kolon ce juman

Nininkalifilan : Kolokani sigira sogodi?

Jaabi : Anw t'o don, mi file bulon koro bi, anw bee tun be, dôw tun be Senegali, dôw tun be sorodasiya la tubabuw bolo, mogô koro si te bulon in kono bi, min be se ka Kolokani sigicogo nefo. Nininkalli sabanan : Aw be laadalako jumenw ke ?

Jaabi : Laadalako te Kolokani, an be don min na i ko bi.

Nininkali naaninan : dugutigi jumen ni jumen sigira Kolokani kun na ? Jaabi : Tine na anw t'o don, an y'a fo anw bee tun be tunga fe, an ka donniya mase o ma.

Nininkaliduurunan : fôlo mogoba jumen ni jumen tun be Kolokani ?

Jaabi : Kumi Jose

Nininkali woɔronan : An be don min na ko bi, a be laadala sonni jumen ni jumen ke ? Jaabi : An be kolon ce juman son. Nka sisan dugu bonyara silameya donna kosebe Kolokani, laadalako korowdabilala sisan.

Nininkali wolowulanan : degun jumen ni jumen b'aw kan ?

Jaabi : Kungo ani ji ko. O de geleýa be dugu kan.

Nininkali kebaa :  
Kekuta Sisoko

## Lamabugu, Zuluye kalo tile 20 san 1993

Ne be bataki ci Jekabaara ma. Nka foli ni walenumandon be ka jesin balikukan lamabugu. Nka foli be Siratigi Tarawele ye, ani Dirisa Kane yaraugabugu. Nka foli be Muso Kane ye (buru), aniseku jara coribugu, ani Kulako jara (Dolobugu), ani Sungalo Trawele ka bo Lamabugu, ani sirama sisoko ka bo Lamabugu, ani Nfa Ali

Bali'k'ukalan kera sababu ye ka waleya camandayele, anw fe Lamabugu. An kera duguyiriwatón ye san 1985. Balikukan kera sababu ye, an ka se k'an ka dugulepo farajogon kan, a kera sababu ye fana ka ton caman sigi Lamabugudugukono, anika dugumogow tin donjogon na. O ye fen ye min ka kan ka don sebe la, walasa an ka je ka kunfinya kele ka bo Maii kono. Lamabugu kalanso dayelela san 1977. On isisan ce yesan 16ye. Anwbe "DNAFLA" nemogow fo k'u barika da kosebe. San 1990 an ni "metewo" ye baara damine jogon fe. K'a damine san 1990 na, sanji hake nalen file. Ka damine, zuwenkalo tile fôlo san 1990 fo okutoburu kalo tile 31. Osanji hake benna millimetere 475,9 ma. Sanji ye nako 42 ke ka damine zuwenkalo tile san 1991 fo okutoburu kalo tile 31 san 1991, o sanji nalen benna millimetere (606) ma, sanjiye nako (54) ke, senefenw neña kosebe. K'a damine zuwenkalo tile fôlo san 1992, fo okutoburukalo tile 31, o sanji nalen benna millimetere 527,7 ma. San ye nako (44) ke. San 1992 samiyé ma ne ka senekelawnisondiya. Kadamine zuwenkalotile fôlo san 1993, fo zuluyekalo tile 21san 1993 sanji naleñ benna millimetere (223,8) ma. San 1993 samiyé ji binna zuluyekalo tile fôlo. O benna millimetere 35,4 ma. Nintunye Lamabugu samiyé kunnafo niye. Neka folibearajoso mogow bee ye. Nka foli be Siratigi Tarawele ye, ani Dirisa Kane yaraugabugu. Nka foli be Muso Kane ye (buru), aniseku jara coribugu, ani Kulako jara (Dolobugu), ani Sungalo Trawele ka bo Lamabugu, ani sirama sisoko ka bo Lamabugu, ani Nfa Ali

Tarawele, zafukuntigi kolokani


Bataki sebenna Yiriba Tarawele fe,  
ka bo Lamabugu kolokani  
ODIMO cikekafo

# Mali ntolatan cedenw "Egiliw" miniji sigira Tinizi

Malawikaw senbofen kō ni kuru 2 ni 1 ye, Mali ntolatan cedenw kera fiñëbarikama ye min ma Ezipti (Misira jamana) ntolatan cedenw to.

Karidon, zuluyekalotile 25, 1993 san, Bamako ntolatan keneba kan (Onminisipori la), Mali ntolatan cedenw (Egiliw) ni farawonw (Ezipti ntolatan cedenw) ye nōgōnkunben ke (min ma tulutige, barisa malidenw bēe tun kōnōgannen don) farafinna ntolatan kupuba yalonni nēbila ntolatanw kadara kōnō, min bēna taa kuncé Tinizi (Tinizi jamana faaba) 1994 san.

Habada nin nōgōn je-ka-wuliba ma ke Mali dugukolo kan ntolatan kadara kōnō kabini Yawunden 1972 san (O ni jinan cē san 21 ye). A nafa koson, maliden cēman n'a musoman, denmisēn ni cēkōroba, bēe wulila i ko cē kelen k'anka ntolatancēdenwsenkōroma




Modibo Sidibe ka faso-kunnawolo-penaliti

dondon, u seko n'u damajira la, ntolatankene kōnō a n'a kō kan. Ntolantan sanga fōlōw kōnō, anw ka cedenw ye Eziptikaw koron kosebē, ka n'o laban ni kuru kelen donni ye Sumahila Tarawele fō sanga 38 nan na. O yōrō nin kelen bēe la, Ezipti cēden Abudu Amed nan'o nōnabila sanga 40 nan na.

Kuru kera kelen ni kelen ye. Ntolantan nōngirinna. Ezipti ntolantan cedenw y'u bolo jigin, ka karabali dabilo, k'utake wale juguw matara fali ye. Ni mōgo ser'u ma, u b'u da duguma, u sera mōgo ma u b'u da duguma. U tora o tibi-taba de la fōka taa wuliko fōlo ban kelen ni kelen. An ka cedenw ka galabu



Mali Samata Segew



### Ezipti (Misira jamana) cedenw (Farawonw)

kene ya se ka yelema don kow la.

Wuliko filanan daminena i n'a fo folo labanna cogo min na. An ka cedenw ye do fara u ka galabu kene ya kan, ka taa daga sigi Eziptikaw ka jo da la.

An tora o de la Eziptikaw wulila u delikow la. Ni Mali mogow ye ntola mine tuma otuma, Eziptikaw b'u yere ke ntola ninina ye, k'u fereke ntolatigi la k'u bo k'u bin. Ni min binna o te wuli. Barisa ni ntolatan tun kuncer'o kelen ni kelen kan siga fosi tun t'a to Mali ka taga Tinizi tagala. Malicedenwy'ut'o de la ka do fara u galabu kene ya kan. O galabu kene ya nafa nana ye ntolatan to tolen sanga woorenan ye. Yatma Jop (O ye Egili ceden do ye) ye ntolan mine, k'i kunda Eziptikaw ka joda kan. A surunyalen joda la, Ramizi (n'o ye Eziptika do ye) ye ntola mine a bolo la u yere ka joda la. O kelen filetigi (aribitiri) y'a ka file fiye ko penaliti. Openaliti kerunna Modibo Sidibe fe Eziptikaw ka jokono sanga 84 nan na. Onana Mali ka kuru ke fila ye ka Ezipti to kuru kelen na. O kuru donnen, Eziptikaw ye pi ke, ka pa ke u ma se ka do were don

Mali kun. U tor'a o pi-pa-pi la fo kana ntolatan ban fila ni kelen na. O kuru kelen donnen kera an ka cedenw ka batike sara ye Tinizi ntolatan kanma.

Labanfile fiylen, Maliden fen o fen tun be ntolatan kene kan, o bee y'u pan jogon fe ko : "taare, taare, an taara Tinizi. Taare, taare an taara Tinizi. Fo Ala tun ka nin ke". Mali cedenw ka batikesara soroli kera nisondiyaba ye Mali seleke naani bee kono. Barisa nin tun y'a san 21 ye (Yawunde ta kofe 1972 san na), Mali tun te ye farafinna ntolatan janaw ka jogonkunben kene kan. San were sa (1994 san) Mali na ye Tinizi ta kene kan. O dun te se ka ke fo Mali ce n'a musow, denmisefara mogokoroba kan, bee ka kan ka wuli ka do fara u ka cesiri kan walasa ka se ka Egilisenkoromadondon an ka nefe taali la. Cedenw (Egili ni Egilikuntigw) fana k'a bila u hakili la ko : Malidenw bee ne b'u la wa u gigi b'u kan.

Ala k'an kunnawolo Tinizi taga in na.

Bakari Sangare

### TULON TE SEBE SA

## Yaala ma ni

Don do kera, ce yaadalen, walima tulomagelen, do taara baroke la a buramanmuso fe. A wulituma selen, a buramusok'a ma ko : i sigi folosanni sanfin ka temen. I komi a yaadalen don, a dalen b'a yere la, a jigi y'a ka marafa fana ye, a ko a buranmuso ma ko : N be taa. Fosi te n sorosira la ! Buranmuso ye foli d'a ye.

Sandibiba in na, a y'a kun bo yoromin na doren, fen do sinna k'a ka marafa burukala (kun) kari k'o jini. O fen to kelen ko ko : e ce, do di n fana ma n k'a jimi ke ! A y'o jaabi ko : i jo. Nin ye marafakala de ye, n'a tigi yere bora tuma min, n b'i son o la. Ce tulomagelen yere y'o men. A buranmuso fana y'o men. Marafakun karila ka ban. A maloyara ka bo. A siranna ka bo. O dun be ke cogo di ?

Madu Ture

Sirakoroje, Marakakungo, Fana  
MAKOCI mara la

### JÉKABAARA SEBENJEKULU

Laboli kintigi

Salif Berte

Sebenbagakuntigi

Tumani Yalam Sidibe

Sebenyoro orodinateri la

Jamana gafe sebenyoro

Baarakjenogonw

MAKOCI, "OCED", "SNV"

Jensenyoro

MAKOCI, "ODIK", OTIWALE,  
"ODIMO"

Labugunyoro

Kibaru

Bonogonko hake

11 000